

**Votaziun dal pievel dal
1. da zercladur 2008
Explicaziuns dal cussegl federal**

- 1 Iniziativa dal pievel «per
naturalisaziuns democraticas»**
- 2 Iniziativa dal pievel «Suve-
ranitad dal pievel senza pro-
paganda da las autoritads»**
- 3 Artitgel constituzional
«Qualitat ed economitad en
l'assicuranza da malsauns»**
(cuntraproject tar l'iniziativa dal pievel
«per premias da la cassa da malsauns
pli bassas en l'assicuranza fundamen-
tala» ch'è vegnida retratga)



Schweizerische Eidgenossenschaft
Confédération suisse
Confederazione Svizzera
Confederaziun svizra

Davart quai vegni votà

Iniziativa dal pievel «per naturalisaziuns democraticas»

Il dretg da burgais communal è in emprim pass impurtant per survegnir il passaport svizzer. L'iniziativa vul autorisar las vischnancias da fixar en moda independenta la procedura e las cumpetenzas per conceder il dretg da burgais communal. Las decisiuns respectivas dal pievel davart naturalisaziuns fissan definitivas e na pudessan pia betg pli vegnir contestadas davant dretgira. L'iniziativa è ina reacziun sin duas decisiuns dal tribunal federal da l'onn 2003 che han obligà las vischnancias d'introducir proceduras contestablas confurm als princips dal stadi da dretg.

Infurmaziuns davart quest project

paginas 5–15

Text da votaziun

pagina 12

Emprim
project

Iniziativa dal pievel «Suveranidad dal pievel senza propaganda da las autoritads»

L'iniziativa dal pievel «Suveranidad dal pievel senza propaganda da las autoritads» pretenda che l'activitat d'infurmaziun da la confederaziun vegnia restrenschida avant votaziuns. Il cussegl federal ed il parlament refusan questa iniziativa, perquai che infurmaziuns da basa objectivas ed equilibradas tras il cussegl federal fan medemamain part da la discussiun publica davart projects da votaziun.

Infurmaziuns davart quest project

paginas 17–27

Text da votaziun

paginas 23–24

Segund
project

Artitgel constituziunal «Qualitat e rentabilitat en l'assicuranza da malsauns» (cuntraproject tar l'iniziativa dal pievel «per premias da la cassa da malsauns pli bassas en l'assicuranza fundamentala» ch'è vegnida retratga). Tar l'iniziativa dal pievel «per premias da la cassa da malsauns pli bassas en l'assicuranza fundamentala» ha il parlament elavurà in cuntraproject. Suenter che l'iniziativa dal pievel è vegnida retratga, decidan il pievel ed ils chantuns mo davart quest cuntraproject.

Infurmaziuns davart quest project

paginas 29–38

Text da votaziun

paginas 34–35

Terz
project

Iniziativa dal pievel «per naturalisaziuns democraticas»

La dumonda da votaziun è:

Vulais Vus acceptar l'iniziativa dal pievel
«per naturalisaziuns democraticas»?

**Il cussegli federal ed il parlament recumondan da refusar
l'iniziativa.**

Il cussegli naziunal ha refusà l'iniziativa cun 127 counter
67 vuschs senza abstensiuns, il cussegli dals chantuns cun
34 counter 7 vuschs tar 2 abstensiuns.

Il pli important en furma concisa

Persunas estras che vulan sa laschar naturalisar – che vulan pia daventar Svizras e Svizzers – ston ademplir las premissas dal chantun da domicil, da la vischnanca da domicil e da la confederaziun. La procedura da naturalisaziun vegn determinada dals chantuns u – sch'il dretg chantunal prevesa quai – da las vischnancas. In dretg da vegnir naturalisà na datti betg, nun ch'ils chantuns prevesian expressivamain quai. Dumondas da naturalisaziun ch'en vegnididas refusadas pon vegnir contestadas davant dretgira e schizunt davant il tribunal federal, sch'i vegn supponì ch'ils dretgs fundamentals sajan vegnididas violads, per exemplu sch'i vegn supponì ch'i saja avant maun ina discriminaziun u ina violaziun da l'attenziun giuridica.

Pratica actuala
per naturalisaziuns

L'iniziativa dal pievel vul midar quest urden da cumpetenzas e pretendà che:

- las vischnancas possian decider en moda independenta, tge organ che dastgia conceder il dretg da burgais communal;
- las decisiuns da naturalisaziun da quest organ sajan definitivas e na possian pia betg pli vegnir contestadas davant dretgira.

Cuntegn
da l'iniziativa
dal pievel

L'iniziativa dal pievel è ina reacciun sin duas sentenziás dal tribunal federal dals 9 da fanadur 2003. En l'emprim cas è la refusa da dumondas da naturalisaziun en ina vischnanca lucernaisa vegnida qualifitgada sco discriminanta ed è vegnida annullada. En il segund cas ha il tribunal federal confermà la declaranza da nunvalaivladad per ina iniziativa en la citad da Turitg. Questa iniziativa vuleva suttametter dumondas da naturalisaziun al pievel. La constituziun federala pretendà ch'i saja avant maun in dretg da motivaziun, sch'ina naturalisaziun vegn refusada. Quai n'è betg pussaivel tar votaziuns a l'urna e cuntrafa pia a la constituziun. Sin quai han ils chantuns pertutgads remplazzà las votaziuns a l'urna tras autres proceduras, en spezial tras decisiuns da radunanzas communalas, da parlaments, d'autoritads executivas u da cumissiuns per

Il tribunal federal
metta barrieras

natralisaziuns. Er avant questas decisiuns dal tribunal federal devi – en proporziun cun il dumber total da las natralisaziuns – mo fitg paucas natralisaziuns, davart las qualas i vegniva la finala decidì a l’urna.

Il cussegl federal ed il parlament refusan l’iniziativa. Las natralisaziuns ston correspunder a las prescripziuns dal stadi da dretg e na dastgan betg esser discriminantas u arbitraras.

Il cussegl federal ed il parlament sustegnan il cuntraproject indirect che las chombras federalas han concludì il december 2007. Quel prevesa che natralisaziuns pon vegnir decididas er vinavant tras radunanzas communalas. Refusas ston dentant vegnir motivadas avant las votaziuns e na dastgan betg esser discriminantas.

Tenuta dal
cussegl federal
e dal parlament

Il project da votaziun en detagi

La raschun per questa iniziativa dal pievel èn decisiuns da natiralisaziun dispitaivlas ch'èn vegnidas prendidas tras votaziuns dal pievel: L'onn 2000 han las votantas ed ils votants d'ina vischnanca lucernaisa refusà las dumondas da natiralisaziun da numerusas persunas ed han natiralisà mo las pentantas ed ils petents da l'exterior vischin. Pervia da violaziun dal scumond da discriminaziun èn las persunas pertutgadas alura sa drizzadas al tribunal federal. Ils 9 da fanadur 2003 ha quel approvà lur recurs ed ha annullà la decisiun da refusa. Il medem di ha il tribunal federal decidi en in auter cas davart la valaivladad d'ina iniziativa che pretendeva d'introducir en la citad da Turitg la votaziun a l'urna per natiralisaziuns. En sia decisiun ha il tribunal federal constatà che votaziuns dal pievel davart dumondas da natiralisaziun cuntrafetschian da princip a la constituziun, perquai che las decisiuns na pos-sian insumma betg vegnir motivadas en questa procedura.

Decisiuns
directivas dal
tribunal federal

En questas decisiuns è il tribunal federal da l'avis ch'ils organs cumpetents stoppian observar prescripzions giuridicas stringentas tar las decisiuns da natiralisaziun – sco quai che er autres autoritads ston far tar lur activitads. Perquai na dastga ina natiralisaziun da princip betg vegnir refusada per motivs subjectivs u nunchapibels, sco quai ch'igl è pussaivel tar ina votaziun a l'urna. Quai fiss per exemplu il cas, sch'ina natiralisaziun vegniss refusada mo, perquai ch'il num da la pentanta u dal patent tradiss ch'ella u ch'el deriva d'in tschert stadi.

Proceduras
correctas per las
natiralisaziuns

Co daventan ins Svizra u Svizzer?

Il dretg da burgais svizzer ha trais stgalims. El po vegnir acquistà en la **procedura ordinaria** mo, sch'il chantun da domicil e sche la vischnanca da domicil concludan la naturalisaziun. Plinavant dovri anc ina permissiun da la confederaziun. Quella vegn per regla concedida mo, sche la petenta u sch'il petent ha dapi almain 12 onns ses domicil en Svizra, sch'ella u sch'el è integrà qua e sch'ella u sch'el enconuscha nossas relaziuns. Da la petenta u dal petent vegni alura pretendì ch'ella u ch'el observia l'urden giuridic svizzer e na pericleteschia betg la segirezza interna ed externa da la Svizra.

In dretg da vegnir naturalisà na datti betg tenor la legislaziun federala. Intgins chantuns, per exemplu Turitg, Basilea, Zug u Genevra, han francà en lur legislaziuns sut tschertas circumstanzas in tal dretg per persunas estras giuvnas. Ils chantuns e las vischnancas pon prevair anc atgnas premissas da naturalisaziun ch'en pli severas che las premissas da la confederaziun. Uschia pretendan per exemplu tut ils chantuns e bunamain tut las vischnancas che la petenta u ch'il petent haja già sia dimora dapi in tschert temp sin lur territori.

La procedura da la **naturalisaziun facilitada** perunter premetta normalmain ch'ins haja in genitur svizzer u ch'ins maridia ina Svizra u in Svizzer. En tals cas vegn la naturalisaziun fatga tras la confederaziun. La naturalisaziun facilitada na fa betg part da l'iniziativa dal pievel qua avant maun.

Sch'ins cumpareglia il **dumber da las naturalisaziuns** cun l'entira populaziun svizra, è la quota da naturalisaziuns relativamain auta en cumparegliazion cun ils auters stadis europeics. Sch'ins cumpareglia dentant il dumber da las persunalas naturalisadas cun la populaziun residenta permanenta estra, ha la Svizra ina quota da naturalisaziuns bassa en la cumparegliazion internazionala.

Return a la
situaziun giuridica
avant l'onn 2003

Cuntrari al tribunal federal vesan las auturas ed ils auturs da l'iniziativa dal pievel in act dal tuttafatg politic en la naturalisaziun. Tras l'iniziativa dal pievel vulessan ellas ed els annular las restricziuns ch'en vegnidas prescrittas dal tribunal federal. En spezial duai puspè esser pussaivel da far naturalisaziuns tras votaziuns a l'urna. Ina decisiun da naturalisaziun na duai plinavant betg stuair vegnir motivada e na duai betg esser contestabla tras in recurs. Uschia n'avessan las personas che vulessan acquistar il dretg da burgais pli naginas pussaivladads giuridicas per vegnir infurmadas davart ils motivs d'ina eventuala refusa.

L'iniziativa vul che las decisiuns da naturalisaziun da l'organ da naturalisaziun cumpetent sajan definitivas. Uschia vegni impedì ch'ina instanza independenta – per exemplu ina dretgira – po controllar las decisiuns areguard lur legalitat. Quai po chaschunar violaziuns dals dretgs individuals che vegnan garantids tras la constituziun, sco per exemplu il scumond da discriminaziun u il scumond d'arbitrariadad.

L'iniziativa vul surlaschar a las votantas ed als votants da mintga vischnanca, co e tras tge organ communal ch'il dretg da burgais communal duai vegnir concedì. Questa cumpetenza na duai betg pudair vegnir restrenschida tras il dretg chantunal. I duai bastar da determinar la procedura da naturalisaziun en l'urden communal.

Controllas
giuridicas
n'en betg pli
pussaivlas

Mintga
vischnanca
decida sezza

La regulaziun che vegn proponida da l'iniziativa stat en cuntradicziun cun il sistem federativ svizzer cumprovà. Qua tras precediss il dretg communal da nov il dretg chantunal ed il dretg federal tar naturalisaziuns. Ina tala regulaziun na datti en nagins auters secturs, ed ella na correspundess betg a la chapientscha vertenta da l'urden giuridic svizzer. Tut tenor la concepziun da l'urden communal resultassan impediments u er facilitaziuns da differenta grevezza sin la via a la naturalisaziun.

Gia avant l'onn 2003 era l'impurtanza da las naturalisaziuns che vegnivan decididas a l'urna, pitschna en cumparegliazion cun il dumber da tut las naturalisaziuns. Mo en paucas vischnancas (en main che 5%) vegnivan las naturalisaziuns decididas a l'urna. En il fratemp han las vischnancas pertutgadas adattà lur proceduras ed han fatg per gronda part bunas experientschas cun talas.

Cuntradicziun
cun il sistem
federativ svizzer

Pitschna
impurtanza



Text da votaziun

Conclus federal davart l'iniziativa federala dal pievel «per naturalisaziuns democraticas»

dals 5 d'october 2007

L'assamblea federala da la confederaziun svizra,

sa basond sin l'artitgel 139 alinea 3 da la constituziun federala¹,
suenter avair examinà l'iniziativa dal pievel «per naturalisaziuns democraticas»
ch'è vegnida inoltrada ils 18 da november 2005²,
suenter avair gi invista da la missiva dal cussegl federal dals 25 d'october 2006³,
concluda:

Art. 1

¹ L'iniziativa dal pievel dals 18 da november 2005 «per naturalisaziuns democraticas» è valaivla e vegn puttamessa a la votaziun dal pievel e dals chantuns.

² Ella sa cloma:

La constituziun federala vegn midada sco suonda:

Art. 38 al. 4 (nov)

⁴ Las votantas ed ils votants da mintga vischnanca determineschan en l'urden communal, tge organ che conceda il dretg da burgais communal. Las decisiuns da quest organ davart la concessiun dal dretg da burgais communal èn definitivas.

Art. 2

L'assamblea federala recumonda al pievel ed als chantuns da refusar l'iniziativa.

¹ CS 101

² fegl uffizial federal 2004 2425

³ fegl uffizial federal 2006 8953

Ils arguments dal comité d'iniziativa

Gea a l'iniziativa – na a naturalisaziuns en massa

Il dumber da las naturalisaziuns en Svizra **explodescha** en il vair senn dal pled: Da l'onn 1991 fin l'onn 2006 è il dumber da las naturalisaziuns per onn sa multipligtà per passa otg giadas! En il fratemp vegnan naturalisadas **mintga onn passa 50 000 persunas estras**, ma da quellas deriva mo stgars in quart dals pajais da la UE. Nus avain da cumbatter cun ina integraziun manglusa e cun problems socials.

En Svizra fixeschan la confederaziun ed ils chantuns las premissas per conceder il dretg da burgais. La decisiun vegn prendida da las vischnancas. Decisiuns davart proceduras da naturalisaziun èn adina vegnidias prendidas en moda democratica en Svizra. Quai è sa cumprovà. **Igl è adina stà incontestà ch'i sa tractia da decisiuns politicas.**

Las vischnancas han pudì decider libramain, tge organ che saja cumpetent en chaussa. Uschia vegni tegnì quint da las differentas relaziuns en las vischnancas. Questa decisiun democratica sto vegnir respectada. **I na dovra mai ina motivaziun u ina giustificazion per ina decisiun democratica.** Mo uschia vegn garantida la libertad d'exprimer l'opiniun.

Mez da l'onn 2003 ha il **tribunal federal** pronunzià nunspetgadamain in scumond da votaziuns a l'urna ed ha pretendì in dretg da far recurs cunter decisiuns negativas. Per quai na datti ni ina basa legala ni ina basa constituziunala.

Pervia da quai ha la PPS lantschà **l'iniziativa dal pievel per naturalisaziuns democraticas** cun la suandanta finamira:

- Las **vischnancas** èn **cumpetentes definitivamain** per decider davart naturalisaziuns en la procedura ordinaria. Las votantas ed ils votants da la vischnanca determineschan l'organ che conceda u che refusa las naturalisaziuns. Quai po esser l'executiva, ina cumissiun per naturalisaziuns, il parlament u la radunanza communalia.
- La decisiun da quest organ è **definitiva**: In recurs cunter ina decisiun negativa è exclus.

Las adversarias ed ils adversaris da l'iniziativa vulan anc dapli naturalisaziuns. La PPS sa dosta dentant **cunter naturalisaziuns en massa**. Cun l'iniziativa dal pievel per naturalisaziuns democraticas duain perquai vegnir rinforzads ils **dretgs democratics da cundecisiun**. Las votantas ed ils votants ston pudair s'exprimer er davart naturalisaziuns! Votai perquai **per l'iniziativa dal pievel per naturalisaziuns democraticas**.

Ulteriuras infurmaziuns: www.einbuergerungen.ch

Ils arguments dal cussegl federal

L'iniziativa «per naturalisaziuns democraticas» ristga che las valurs fundamentalas na valan betg dapertut e per tuts da medema maniera. L'aboliziun dal scumond da discriminaziun e dal scumond d'arbitrariadad che vegn pretendida tar naturalisaziuns cuntrafa al stadi da dretg modern. Sche l'iniziativa vegniss acceptada, daventassan las proceduras efficazias ch'èn vegnidas introducidas en moda democratica, obsoletas en numerus chantuns. Il cussegl federal refusa l'iniziativa cunzunt per ils sustants motivs:

Il cussegl federal è da l'avis che las persunas che vulessan acquistar il dretg da burgais hajan il dretg da proceduras gistas e che las autoritads da naturalisaziun stoppian esser liadas vi dals dretgs fundamentals, en spezial vi dal scumond da discriminaziun e vi dal scumond d'arbitrariadad. Tgi che vul sa laschar naturalisar ed exprima sia voluntad da daventar Svizra u Svizzer cun tut ils dretgs e cun tut las obligaziuns, duai pudair far quint ch'i vegnia decidì en moda correcta e transparenta davart sia dumonda da naturalisaziun sin plau communal.

Il titel da l'iniziativa dal pievel lascha crair che mo decisiuns da naturalisaziun che vegnan prendidas tras las votantas e tras ils votants sajan democraticas. A quai stoi vegnir opponì ch'ils chantuns decidan tenor reglas democraticas, tge gremi che po decider davart las naturalisaziuns – per exemplu la radunanza da burgais ubain in cussegl da naturalisaziun ch'è vegni elegì en moda democratica.

Evitar
discriminaziuns
ed arbitrariadads

Las decisiuns da
naturalisaziun han
ina legitimaziun
democratica

Ina democrazia ferma dovrà in stadi da dretg che funcione-scha e che garantescha proceduras gistas e correctas per tut las abitantas e per tut ils abitants. L'organ cumpetent è er oz liber da refusar naturalisaziuns, sche quai vegn motivà en moda objectiva – per exemplu sche l'integrazion manca.

Inadmissibla è sulettamain la refusa discriminanta ed arbitria, per exemplu la refusa da tut las dumondas da persunas che derivan d'in tschert pajais u che han in tschert num, ina tscherta religiun u ina tscherta colur da la pel. In dretg da vegnir naturalisà na datti betg tenor la legislaziun federala.

Tenor il dretg vertent exista l'autonomia communalia mo là, nua ch'il dretg chantunal prevesa quai. L'iniziativa rumpa quest urden federativ cumprovà e prenda davent als chantuns la cumpetenza per determinar las proceduras da naturalisaziun sin plaun communal. Quai chaschunass bleras differentas proceduras e cumpetenças da naturalisaziun sin in pitschen spazi. Quest fracziunament dal dretg pudess chaschunar – sco en il passà – in turissem da naturalisaziun nungiavischà, e quai na po betg esser en l'interess da las vischnancas sco er da las burgaisas e dals burgais. L'iniziativa stat en cuntradicziun cun la pratica cumprovada e cun il dretg consti-tuzional da numerus chantuns.

L'exclusiun d'in dretg da far recurs cunter decisiuns da naturalisaziun discriminantas – sco quai che l'iniziativa pretenda – stat en cuntradicziun cun obligaziuns internaziunalas da la Svizra e sutmineschà la constituziun. La constituziun federala garantescha che mintga persuna haja la pussaivladad da far recurs, sche ses dretgs vegnan violads, e che mintga persuna vegnia protegida en spezial cunter discriminaziuns pervia da ses origin.

Per tut queste motivs recumondan il cussegl federal ed il parlament da refusar l'iniziativa dal pievel «per naturalisaziuns democraticas».

Proceduras dal stadi da dretg, dentant nagin dretg da vegnir naturalisà

Mantegnair l'urden federativ cumprovà

Garantir ils drets fundamentals

Iniziativa dal pievel «Suveranitad dal pievel senza propaganda da las autoritads»

La dumonda da votaziun è:

Vulais Vus acceptar l'iniziativa dal pievel
«Suveranitad dal pievel senza propaganda da las autoritads»?

**Il cussegli federal ed il parlament recumondan da refusar
l'iniziativa.**

Il cussegli naziunal ha refusà l'iniziativa cun 134 counter
61 vuschs tar 3 abstensiuns, il cussegli dals chantuns cun
38 counter 2 vuschs tar 3 abstensiuns.

Il pli impurtant en furma concisa

En Svizra protegia la constituziun, la furmaziun libra da la voluntad e la votaziun nunfalsifitgada. Per che las votantas ed ils votants possian far diever da lur dretgs democratics fundamentals, ston ellas ed els enconuscher il cuntegn d'ina votaziun, las novaziuns las pli impurtantas sco er ils arguments che vegnan fatgs valair per e cunter il project. A la furmaziun da l'opiniun avant las votaziuns contribuescha la discussiun publica ina part decisiva. A questa discussiun publica sa participescha er il cussegl federal. En quest connex sto el observar ils princips da l'objectivitat, da la transparenza e da la proporziunalitat.

Infurmaziuns dal
cussegl federal
avant votaziuns

Las iniziantas ed ils iniziants resentan las infurmaziuns da las autoritads federalas davart las votaziuns sco propaganda. L'activitat d'infurmazion dal cussegl federal e da l'administraziun federala avant las votaziuns duai perquai vegnir scumandada per gronda part. Admissiblas fissan sulettamain las explicaziuns dal cussegl federal ed ina infurmaziun curta ed unica da la scheffa u dal chef dal departament cumpetent.

Tge vul
l'iniziativa?

Er sche l'iniziativa vegniss acceptada, fiss il cussegl federal obligà sin basa da la constituziun d'infurmari la publicitat a temp ed en moda cumplessiva davart sia activitat. Suenter la votaziun finala en il parlament na dastgass il cussegl federal dentant praticamain betg pli s'exprimer davart ils projects da votaziun. La discussiun publica fiss dentant manglusa, sch'in actur impurtant – che ha enconuschientschas spezialas da la chaussa – na dastgass betg pli sa participar a tala.

Consequenzas
da l'iniziativa

Per il cas che l'iniziativa vegn refusada, ha il parlament deliberà in cuntraproject indirect tar l'iniziativa. Quel franchisescha sin il stgalim da la lescha tant l'obligaziun dal cussegl federal d'infurmajar las votantas ed ils votants sco er ils princips per las infurmaziuns da las autoritads federalas davart las votaziuns.

Il cussegl federal ed il parlament refusan l'iniziativa: Sche l'iniziativa vegniss acceptada, vegniss periclitada la furmaziun libra da la voluntad da las votantas e dals votants.

Cuntraproject
indirect

Puntg da vista dal
cussegl federal
e dal parlament

Il project da votaziun en detagi

Las Svizras ed ils Svizzers voteschan mintga onn pliras giadas davart projects da votaziun federrals. La basa per la furmaziun libra da la voluntad da las votantas e dals votants è la discussiun publica avant las votaziuns. A tala sa particepscha er il cussegl federal e contribuescha uschia al fatg che las votantas e ch'ils votants pon sa far in maletg cumplessiv dal project da votaziun.

En la cuntraversa politica avant las votaziuns pon las aderen-
tas ed ils aderents sco er las adversarias ed ils adversaris
d'in project da votaziun – che quai sajan partidas, federaziuns
u persunas privatas – da princip tscherner libramain lur
meds. Auter è quai tar il cussegl federal e tar l'administraziun
federala. Els ston sa tegnair vi dals princips d'infurmazion
moda objectiva, transparenta e proporziunada. Far propa-
ganda n'è betg admissibel.

L'iniziativa vul pia restrenscher supplementarmain l'activitatad
d'infurmazion dal cussegl federal e da l'administraziun fede-
rala avant las votaziuns. Admissiblas fissan sulettamain anc
las explicaziuns dal cussegl federal ed ina infurmaziun curta
ed unica da la scheffa u dal schef dal departament cumpetent
per la populaziun.

Sch'i giess tenor l'iniziativa na dastgassan il cussegl federal,
ils caders superiurs da l'administraziun federala ed ils uffizis
federals ultra da quai betg pli s'exprimer davart ils projects
da votaziun suenter las votaziuns finalas en il parlament. Per
la confederaziun fissi er scumandà strictamain da manar tras
e da finanziar campagnas d'infurmazion davart projects da
votaziun.

Plinavant obligelescha l'iniziativa la confederaziun, ils chan-
tuns e las vischnancas d'annunziar uffzialmain las datas da
votaziun almain sis mais ordavant e da metter a disposizion
gratuitamain a las votantas ed als votants ils projects da
votaziun ensemen cun ils texts giuridics vertents. La finala
duai il legislatur ordinari sancziuns, en cas ch'ils dretgs poli-

La discussiun
publica sco basa
per la furmaziun
da la voluntad

Princips actuals
da las infurmaziuns
davart las
votaziuns

Finamiras
da l'iniziativa

tics èn vegnids violads, e quai entaifer dus onns suenter che l'iniziativa è vegnida acceptada.

Sche l'iniziativa vegniss acceptada, avess quai per consequenza ch'il cusegl federal e che l'administraziun federala na pudessan betg pli s'exprimer durant il cumbat da votaziun. I na fiss per exemplu betg pli pussaivel per las commembraas e per ils commembers dal cusegl federal da sa participar ad occurrentzas cuntradictoricas ed ad emissiuns da televisiun u da sa preschentiar a radunanzas da delegadas e da delegads da lur partidas. Per las cuseglieras federalas e per ils cusegliers federales fissi exclus da dar intervistas e da prender posiziun davart ils projects da votaziun e davart ils differents arguments. Plinavant na dastgassan ils departaments ed ils uffizis federales sco er il parlament publitgar nagini infurmazioni supplementaras davart ina votaziun, e quai ni en furma stampada ni en l'internet.

L'iniziativa cuntegna intschertezzas che chaschunassan problems tar la realisaziun.

I n'è betg cler, sch'i bastass da metter a disposizion en l'internet ils texts giuridics che appartegnan als documents da votaziun u sche mintgamai tut ils texts giuridics vertents stuessan vegnir tramess a las votantas ed als votants sin palpiri, ensemble cun ils ulteriurs documents da votaziun. Quest ultim cas chaschunass custs supplementars considerables per la confederaziun, per ils chantuns e per las vischnancas e vuless dir ch'i stuess – tar projects da votaziun voluminus – vegnir tramess a las votantas ed als votants in pachet cun tschients da paginas.

Tar leschas federalas che vegnan declaradas sco urgentas avess la regulaziun, tenor la quala ina data da votaziun sto vegnir publitgada obligatoricamain sis mais ordavant, plinavant per consequenza ch'i na pudess en il cas singul – contrari a la prescripziun en la constituziun – betg vegnir votà davart questas leschas entaifer in onn. Intschert è plinavant, co ch'il termin da sis mais duess vegnir realisà en ils chantuns ed en las vischnancas.

Consequenzas
da l'iniziativa

Intschertezzas
en il text
da l'iniziativa

Ils onns passads è il parlament sa fatschentà pliras giadas cun las infurmaziuns dal cussegl federal e da l'administraziun federala davart las votaziuns: El vul ina regulaziun legala, ma cun lingias directivas e betg cun scumonds. La lescha ch'è vegnida deliberada dal parlament sco cuntraproject indirect obligeasca il cussegl federal d'infurmarr las votantas ed ils votants e determinescha ils princips per infurmarr la populaziun davart las votaziuns: Il cussegl federal sto infurmarr en moda objectiva, transparenta e proporziunala davart in project da votaziun. Uschia vegni francà en la lescha ch'i na saja betg admissibel da far propaganda da votaziun. Plinavant prescriva il project da lescha ch'il cussegl federal na dastga represchentar natinas recumandaziuns da votaziun che divergeschan da quellas da l'assamblea federala.

Sche l'iniziativa «Suveranitad dal pievel senza propaganda da las autoritads» vegniss refusada, cumenzass il termin da referendum per il cuntraproject indirect ed i pudess dar anc ina giada ina votaziun davart las infurmaziuns dal cussegl federal.

Cuntraproject
indirect



Text da votaziun

Conclus federal davart l'iniziativa dal pievel «Suveranitad dal pievel senza propaganda da las autoritads» dals 21 da decembre 2007

L'assamblea federala da la confederaziun svizra,

sa basond sin l'artitgel 139 alinea 3 da la constituziun federala¹,
suenter avair examinà l'iniziativa dal pievel «Suveranitad dal pievel senza
propaganda da las autoritads» ch'è vegnida inoltrada ils 11 d'avust 2004²,
suenter avair gi invista da la missiva dal cussegl federal dals 29 da zercladur 2005³,
concluda:

Art. 1

¹ L'iniziativa dal pievel dals 11 d'avust 2004 «Suveranitad dal pievel senza propaganda da las autoritads» è valaivla e vegn puttamessa a la votaziun dal pievel e dals chantuns.

² Ella sa cloma:

La constituziun federala vegn midada sco suonda:

Art. 34 al. 3 e 4 (nov)

³ Suenter la finiziun da las tractativas parlamentaras vegnan garantidas la furmaziun libra da la voluntad e la votaziun nunfalsifitgada en spezial sco suonda:

- a. Il cussegl federal, las commembraas ed ils commembers dal cader superieur da l'administraziun federala sco er ils uffizis federrals s'abstegnan da l'activitat d'infurmaziun e da propaganda. Ellas ed els desistan en spezial da sa preschentar en las medias e da sa participar ad occurrentzas d'infurmaziun e da votaziun. Exceptada da quai è ina infurmaziun curta ed unica per la populaziun tras la scheffa u tras il chef dal departament cumpetent.
- b. La confederaziun desista dal tuttafatg da finanziar, da realisar e da sustegnair campagnas d'infurmaziun e propaganda da votaziun sco er da producir, da publitgar e da finanziar material d'infurmaziun e da propaganda. Exceptada da quai è ina broschura objectiva cun las explicaziuns dal cussegl federal a las votantas ed als votants. En quella ston vegnir resguardads en moda equilibrada ils arguments per e cunter il project da votaziun.
- c. La data da votaziun vegn publitgada almain sis mais ordavant.

¹ CS 101

² fegl uffizial federal 2004 4847

³ fegl uffizial federal 2005 4373



d. Ils projects da votaziun ed ils texts vertents vegnan mess a disposiziun gratuitamain a las votantas ed als votants.

⁴ Entaifer dus onns ordinescha la lescha sancziuns, sch'ils dretgs politics vegnan violads.

Art. 2

L'assamblea federala recumonda al pievel ed als chantuns da refusar l'iniziativa.

Ils arguments dal comité d'iniziativa

- L'iniziativa «Suveranitad dal pievel senza propaganda da las autoritads» promova il **consens en vista ad ina politica futura positiva**. Ella stgaffescha **cleras relaziuns** e procura che nossa democrazia è populara e chapibla per tuts.
- La suveranitad dal pievel garantescha la libra opiniu e la democrazia directa. Ella **eliminescha la propaganda inutila da las autoritads**.
- La suveranitad dal pievel sustegna ina **infurmazion averta, gista e sincera**. Ella **impedescha che campagnas da votaziun vegnan manadas da las autoritads**.
- Il cussegl federal duai **prender serius il pievel**, el na duai betg sa cumportar **sco ina partida politica** e na duai betg vulair gudagnar.

Il motiv per l'iniziativa

Avant votaziuns impurtantas – sco per exemplu tar il moratori da la tecnologia genetica, tar la lescha davart il martgà d'electricitat, tar la lescha da lavur u tar la nova constituziun federala – influenzecha l'administraziun federala adina pli fitg la furmaziun da l'opiniun da las votantas e dals votants. Cun l'autoritat ch'è dada ad ella tras sia funcziun vegni proclamà: «Questa votaziun stuain nus gudagnar!» Ils uffizis federales, ma er agenturas da PR e da reclama vegnan incumbensads da manar il cumbat da votaziun en il senn dal cussegl federal. Quai na correspunda betg a las usanzas democraticas da noss pajais. Noss dretg fundamental da pudair fummar nossa opiniu senza vegnir influenzà vegn violà pli e pli.

I na vegn betg scumandà al cussegl federal da discurrer. Anzi! L'iniziativa pretenda dad el d'infumar las votantas ed ils votants a temp, en moda cumplessiva e gista. L'iniziativa impedescha uschia che las taglias vegnan sfarlattadas per ina propaganda da votaziun che n'è betg necessaria e per cumbats da votaziun mal-gists.

Il cussegl federal sa cumporta pli e pli sco partida e considerescha las votantas ed ils votants sco sias «adversarias» e sco ses «adversaris». Las perdentes ed ils perdents da quest «engaschament» chattan ins en tut ils champs politics.

Il cuntraproject dal parlament va precisamain en la direcziun opposta. La violaziun da la separaziun da las pussanzas daventass legala e la libra opiniu vegniss violada anc pli fitg. La suveranitad dal pievel preserva la Svizra da daventar ina democrazia dirigida.

Il dretg da nus Svizras e da nus Svizzers da la libra opiniu na dastga betg vegnir restrenschì. Perquai pretenda l'iniziativa che tut las votantas e che tut ils votants vegnian infurmads en moda averta, gista e sincera.

Ulteriuras infurmaziuns: www.freie-meinung.ch

Ils arguments dal cussegl federal

La furmaziun libra da la voluntad sin basa d'ina discussiun publica è in element central da la democrazia directa. En questa discussiun sto il cussegl federal preschentar ed argumentar objectivamain sia politica e las decisiuns dal parlament. Igl è impurtant che las commembras e ch'ils commembres dal cussegl federal possian far quai er en il contact direct cun la populaziun. Il dialog permanent tranter las votantas ed ils votants d'ina vart ed il cussegl federal e l'administraziun da l'autra vart na duess betg stuair vegnir interrut tuttenina avant las votaziuns. Il cussegl federal refusa l'iniziativa cunzunt per ils sustants motivs:

Las votantas ed ils votants han il dretg da furmazion libramain lur opiniu e da procurar per las infurmaziuns. En cas che l'iniziativa vegniss acceptada, vegniss quai mess en dumonda, sche las votantas e sch'ils votants na vegnissan betg a savair l'opiniu dal cussegl federal en la fasa la pli intensiva dal process da la furmaziun da la voluntad. Sch'il cussegl federal na pudess betg sa participar a la discussiun publica, responder dumondas, sclerir intschertezzas, sa fatschentar cun novs arguments u mussar connexs e consequenzas da la decisiun, restrenschess quai la furmaziun libra da l'opiniu. L'iniziativa periclitecha quest dretg constituzional impurtant da las votantas e dals votants.

Sche l'iniziativa vegniss acceptada, avess quai consequenzas da gronda impurtanza: Il cussegl federal pudess bain er sa drizzar vinavant a las votantas ed als votants cun ina infurmaziun curta sco er cun las explicaziuns. Percunter avess el in scumond explicit e general da sa preschentar en las medias, da sa participar ad occurrentzas da votaziun sco er da prender part a l'ulteriura discussiun publica. El na dastgass er betg pli reagir sin pretensiuns nuncumprovadas. Per il cussegl federal va quai memia lunsch: En Svizra n'èsi betg usità ch'i vegn scumandà ad ina participanta u ad in participant d'ina discussiun da prender il pled.

Garanzia da la
furmaziun libra
da l'opiniu

Nagin scumond
da discurrer

En nossa democrazia directa n'ha in cumbat da votaziun betg mo lieu en debattas publicas, mabain sa manifestescha er en inserats da gassetas, sin paraids da placats u en brevs da lecturas e da lecturs. Las federaziuns, las partidas politicas u persunas privatas dastgan manar campagnas politicas sur quests chanals e far propaganda da votaziun. Il cussegl federal e l'administrazione federala percuter na dastgan gia oz betg proceder sco partidas politicas: Il cuntegn da las infurmaziuns da las autoritads sto esser correct ed equilibrà. A las autoritads n'esi plinavant betg permess da publitgar inserats da gassetas u da finanziar campagnas da placats.

L'iniziativa survesa che l'infurmaziun n'è betg ina via a direzion unica. Ella ignorescha er il basegn exprimì e crescent da las burgaisas e dals burgais da procurar per infurmaziuns supplementaras. Sche l'iniziativa vegniss acceptada, avess quai per consequenza che gist votantas e votants activs che s'interessan per infurmaziuns supplementaras e pli detagliadas, na chattassan naginas respotas a lur dumondas en la purschida electronica u stampada da l'administrazione federala. Il cussegl federal e l'administrazione federala na dastgasen er betg pli responder a dumondas directas.

La fin da l'onn 2007 ha il parlament deliberà in cuntraproject indirect tar l'iniziativa. Sin il stgalim da la lescha determine-scha quel l'obligazion dal cussegl federal d'infurmà las votantas ed ils votants avant votaziuns e fixescha ils princips da l'objectivitat, da la transparenza e da la proporziunalidad sco princips per las infurmaziuns da las autoritads. Plinavant vegni determinà ch'il cussegl federal na dastga represchentar naginas recumondaziuns da votaziun che divergeschan da quellas da l'assamblea federala. Quest cuntraproject entra en vigur, sche l'iniziativa vegn refusada e sch'i na vegn betg fatg in referendum cunter quest cuntraproject.

Per tut quests motivs recumondan il cussegl federal ed il parlament da refusar l'iniziativa dal pievel «Suveranitat dal pievel senza propaganda da las autoritads».

Far propaganda
da votaziun
è scumandà gia oz

Betg laschar avert
las dumondas
da las votantas
e dals votants

Il cuntraproject
è pli adattà

Artitgel constituziunal «Qualitat ed economitad en l'assicuranza da malsauns»

(cuntraproject tar l'iniziativa dal pievel «per premias da la cassa da malsauns pli bassas en l'assicuranza fundamentala» ch'è vegnida retratga)

La dumonda da votaziun è:

Vulais Vus acceptar l'**artitgel constituziunal «Qualitat ed economitad en l'assicuranza da malsauns»?**

(Cuntraproject tar l'iniziativa dal pievel «per premias da la cassa da malsauns pli bassas en l'assicuranza fundamentala» ch'è vegnida retratga)

Il cussegl federal ed il parlament recumondan d'acceptar l'artitgel constituziunal.

Il cussegl naziunal ha acceptà il project da votaziun cun 133 cunter 63 vuschs tar 2 abstensiuns, il cussegl dals chantuns cun 29 cunter 13 vuschs tar 1 abstensiun.

Il pli important en furma concisa

L'iniziativa dal pievel «per premias da la cassa da malsauns pli bassas en l'assicuranza fundamentala» aveva la finamira da sbassar las premias. Quai avess duì vegnir cuntanschì tranter auter cun reducir il catalog da prestaziuns. Il text da l'iniziativa na precisava dentant betg, tge prestaziuns che fis-san stadas pertutgadas da quai.

Il parlament
refusa l'iniziativa
dal pievel...

Il parlament è s'exprimì cunter l'iniziativa. Durant las discussiuns ha el dentant elavurà in cuntraproject che surpiglia tscherts giavischs da l'iniziativa dal pievel e che fixescha en la constituziun ils princips essenzials da l'assicuranza da malsauns sociala. Sin basa da quai ha il comité d'iniziativa retratg l'iniziativa. Per consequenza vegni votà mo davart il cuntraproject.

...e propona in
cuntraproject

Il parlament è da l'avis ch'i saja raschunaivel da reglamentar sin il stgalim da la constituziun ils elements ed ils princips essenzials da l'assicuranza da malsauns sociala. Uschia duai vegnir dada a l'assicuranza da malsauns in'orientaziun che garantescha in provediment da la sanadad ch'è accessibel a tuttas ed a tuts per in pretsch adequat. En la constituziun vegnan integrads – sco princips centrals da l'assicuranza da malsauns sociala – en spezial la concurrenza tranter las assi-curanzas (cassas da malsauns) e las furnituras ed ils furniturs da prestaziuns (ospitals, medias e medis e. u. v.) sco er la qualitat e l'economitad da las prestaziuns.

Princips sin il
stgalim da la
constituziun

En il parlament hai dà er vuschs criticas davart quest cuntraproject. Igl è cunzunt vegnì crititgà ch'el saja vegnì elavurà en gronda prescha, senza integrar duidamain en la procedura las participadas ed ils participads, q.v.d. oravant tut ils chantuns. Plinavant èsi vegnì objectà che betg tut las disposiziuns na sajan degnas da figurar en la constituziun e che tscherts princips impurtants, sco per exemplu la solidaritat, manchian en il cuntraproject.

Al cussegl federal bastass la disposiziun constituziunala vertenta. Ma oz sostegna el il cuntraproject dal parlament, perquai che quel va da princip en la dretga direcziun.

Critica davart
la procedura e
davart il cuntegn

Posiziun dal
cussegl federal

Il project da votaziun en detagi

En la constituziun federala èsi reglè oz sulettamain che la confederaziun relascha prescripziuns davart l'assicuranza da malsauens e ch'ella ha la cumpetenza da declarar l'assicuranza da malsauens sco obligatorica, saja quai generalmain u per singulas gruppas da la populaziun. Ils princips da l'assicuranza da malsauens sociala vegnan fixads sin il stgalim da la lescha, en emprima lingia en la lescha federala davart l'assicuranza da malsauens (LAM). Questa lescha regla en spezial l'obligaziun d'avair in'assicuranza da malsauens, la finanziazion solidara da l'assicuranza da malsauens, l'admissiun da cassas da malsauens sco er da furnituras e da furniturs da prestaziuns, la dimensiun dal catalog da las prestaziuns, la libra tscherna da l'assicuranza, da las furnituras e dals furniturs da prestaziuns sco er las contribuziuns dal maun public. Gia oz sa drizza l'assicuranza da malsauens ultra da quai tenor ils princips da la concurrenza reglamentada e da la transparenza.

Regulaziun
vertenta da
l'assicuranza
da malsauens

Tenor il nov artitgel constituziunal relascha la confederaziun prescripziuns davart l'assicuranza da malsauens. Questa assicuranza da malsauens cumpiglia in'assicuranza per la tgira da malsauens e po cuntegnair er in'assicuranza da diarias. L'assicuranza per la tgira da malsauens conceda prestaziuns en cas da malsogna ed en cas da maternitat e po er prevair prestaziuns en cas d'accident ed en cas da dependenza da tgira.

Il nov artitgel
constituziunal

Il nov artitgel constituziunal menziunescha explicitamain divers princips impurtants che valan gia oz. Las prestaziuns che vegnan indemnissadas da l'assicuranza da malsauens duain esser effizientas, adequatas ed economicas. Las furnituras ed ils furniturs da prestaziuns (ospitals, medias e medis e.u.v.) duain furnir prestaziuns da buna qualitad. L'assicuranza da malsauens sa drizza ultra da quai tenor ils princips da la concurrenza e da la transparenza. Plinavant duai vegnir promovida l'atgna responsabludad da las personas assicuradas. Il dretg da las personas assicuradas da far ina libra tscherna tranter las cassas da malsauens admessas e tranter

Princips
da l'assicuranza
da malsauens

las furnituras ed ils furniturs da prestaziuns autorisads vegn garanti tar l'assicuranza obligatorica per la tgira da malsauns. L'obligaziun d'avair in'assicuranza da malsauns na vegn betg reglada expressivamain, ma er betg messa en dumonda.

Cun realisar l'assicuranza da malsauns duain la confederaziun ed ils chantuns procurar communablamain per in provediment da la sanadad da buna qualitat e da gronda rentabilitat e coordinar lur mesiras. Quai na signifitgescha dentant betg che las cumpetenças vegnian transferidas – en il sectur da la sanadad – dals chantuns a la confederaziun, u – en il sectur da l'assicuranza da malsauns – da la confederaziun als chantuns. La finamira è plitost da garantir – tras stentas comunablas – la qualitat e l'economitad dal provediment da la sanadad en il rom da l'assicuranza da malsauns.

L'assicuranza per la tgira da malsauns duai vegnir finanziada sco fin ussa tras las premias e tras las participaziuns als custs da las personas assicuradas sco er tras contribuziuns dal maun public. Da nov na duain las contribuziuns dal maun public betg pli vegnir pajadas a las furnituras ed als furniturs da prestaziuns (cunjunt ospitals), mabain a quella instituziun che indemnisescha las prestaziuns. Quai èn oz las cassas da malsauns. Cun questa nova disposizion vegn stgaffida la basa per in uschenumnà sistem da finanziaziun monistic. Tenor quest sistem vegnan finanziadas las prestaziuns dals ospitals or d'in maun, e betg sco fin oz tras contribuziuns da las cassas da malsauns d'ina vart e dal maun public da l'autra vart (uschenumnà sistem da finanziaziun dualistic).

Il nov artitgel constituziunal na cuntegna naginas prescripcions davart la fixaziun da las premias. El menziunescha dentant expressivamain la reducziun da las premias che vegn ad esser ina incumbensa communabla da la confederaziun e dals chantuns. Questa reducziun da las premias vegn concedida vinavant tenor la situaziun economica da las personas assicuradas, e quai respectond il princip da solidaritat.

Coordinaziun da las mesiras da la confederaziun e dals chantuns

Finanziaziun da l'assicuranza per la tgira da malsauns

Premias e reducziun da las premias



Text da votaziun

Cuntraproject da l'assamblea federala tar l'iniziativa dal pievel «per premias da la cassa da malsauns pli bassas en l'assicuranza fundamentala»

Or dal conclus federal
dals 21 da decembre 2007

L'assamblea federala propona da midar la constituziun federala¹ sco suonda:²

Art. 117 Assicuranza cunter accidents

¹ La confederaziun relascha prescripziuns davart l'assicuranza cunter accidents.

² Ella po declarar sco obligatorica l'assicuranza cunter accidents, saja quai generalmain u per singulas gruppas da la populaziun.

Art. 117a Assicuranza da malsauns (nov)

¹ La confederaziun relascha prescripziuns davart l'assicuranza da malsauns.

² L'assicuranza da malsauns cumpiglia in'assicuranza per la tgira da malsauns; ella po cuntegnair er in'assicuranza diarias. L'assicuranza per la tgira da malsauns prevesa prestaziuns en cas da malsogna e da maternitad; ella po er prevair prestaziuns da dependenza da tgira ed en cas d'accident.

³ La confederaziun observa ils sustants princips cun relaschar las prescripziuns:

- a. las prestaziuns da la tgira da malsauns ston esser effizientas, adequatas ed economicas;
- b. l'assicuranza da malsauns sa drizza tenor ils princips da la concurrenza e da la transparenza. L'atgna responsabladad da las personas assicuradas vegn promovida;
- c. las assicuranzas che vulan esser activas en il rom da l'assicuranza da malsauns basegnan in'admissiun;
- d. las premissas, sut las qualas las furniturs ed ils furniturs da prestaziuns pon esser activs a quint da l'assicuranza per la tgira da malsauns, vegnan fixadas uschia, che la qualitat da las prestaziuns e che la concurrenza èn garantidas.

⁴ La confederaziun po declarar l'assicuranza da malsauns sco obligatorica, saja quai generalmain u per singulas gruppas da la populaziun. Las personas ch'èn obligadas d'avair in'assicuranza obligatorica per la tgira da malsauns pon tscherner libramain tranter las assicuranzas da malsauns admessas e tranter las furniturs ed ils furniturs

¹ CS 101

² tar quest text sa tracti dal cuntraproject dal cussegli federal e dal parlament tar l'iniziativa dal pievel «per premias da la cassa da malsauns pli bassas en l'assicuranza fundamentala» ch'è vegnida retratga a favor da las suandantas disposiziuns

da prestaziuns ch'èn autorisads da pratitgar lur activitat a quint da l'assicuranza da malsauns.

⁵ Cun realisar l'assicuranza da malsauns procuran la confederazion ed ils chantuns communablamain en il rom da lur cumpetenzas per in provediment da la sanadad da buna qualitat e da gronda rentabilitad e coordineschan lur mesiras.

⁶ L'assicuranza per la tgira da malsauns vegn finanziada tras las premias e tras las participaziuns als custs da las personas assicuradas sco er tras contribuziuns dal maun public che vegnan pajadas a l'instituzion che indemnisescha las prestaziuns. La confederazion ed ils chantuns prevesan reducziuns da las premias; els resguardan la situaziun economica da las personas assicuradas.

L'assamblea federala recumonda al pievel ed als chantuns d'approvar il cuntraproject.

Las tractativas en il parlament

Il cussegl federal ed il parlament han refusà l'iniziativa dal pievel «per premias da la cassa da malsauns pli bassas en l'assicuranza fundamentala». Il parlament ha dentant concludì da far in cuntraproject tar l'iniziativa cun il titel «Qualitat ed economitad en l'assicuranza da malsauns». El ha l'intenziun da fixar uschia l'orientaziun da l'assicuranza da malsauns en la constituziun. Suenter intginas resalvas inizialas sostegna il cussegl federal ussa il cuntraproject.

Il parlament ha profità da l'iniziativa dal pievel per integrar en la constituziun ils elements ed ils princips essenzials da l'assicuranza da malsauns ed en spezial da l'assicuranza per la tgira da malsauns. Ad el pari giustifitgà da reglar detagliadament questa branscha impurtanta da l'assicuranza sociala en la constituziun, e quai confurm a sia impurtanza per l'entir sectur da la sanadad.

Il cuntraproject metta l'accent sin la qualitat e sin la rentabilitad da las prestaziuns che vegnan indemnisas tras l'assicuranza da malsauns. Plinavant vegni fixà expressivamain che l'assicuranza da malsauns haja da sa drizzar tenor ils princips da la concurrenza e da la transparenza. Cun quests princips essenzials ha il parlament l'intenziun da dar ina nova orientaziun a l'assicuranza da malsauns. Il rinforzament da la concurrenza tranter las assicuranzas sco er tranter las furnituras ed ils furniturs da prestaziuns duai avair in effect positiv sin la qualitat e sin la rentabilitad da las prestaziuns. Las reglamentaziuns dal stadi duain vegnir restrenschidas al pli necessari.

Fixaziun sin il
stgalim da la
constituziun

Concurrenza,
rentabilitad
e qualitat

Il parlament è er s'exprimì a favur dal fatg che las persunas assicuradas possian tscherner libramain tranter las assicuranzas da malsauns ch'en admessas e tranter las furnituras ed ils furniturs da prestaziuns autorisads, sch'i dat in'assicuranza obligatorica per la tgira da malsauns. A chaschun da las discussiuns èsi dentant vegnì accentuà expressivamain che la libra tscherna da las furnituras e dals furniturs da prestaziuns sin basa facultativa possia vegnir restrenschida per tschertas furmas d'assicuranza. I duai restar er vinavant puissaivel d'attribuir tscherts circuls da persunas, sco per exemplel las requirentas ed ils requirents d'asil, a tschertas assicuranzas da malsauns specificas che porschan ina furma d'assicuranza speziala.

Libertad
da tscherner

Il princip da la libertad da contract na vegn betg menziunà explicitamain en l'artitgel constituziunal. L'artitgel na di pia betg, sche las assicuranzas da malsauns èn obligadas da collavurar – sco fin ussa – cun tut las furnituras e cun tut ils furniturs da prestaziuns (obligaziun da contract) u sch'ellas pon – en il futur – far ina tscherna. En la discussiun parlamentara è la dumonda stada contestada, sche e quant fitg che la libertad da contract po vegnir deducida da l'orientaziun da l'artitgel constituziunal. Quest artitgel metta la concurrenza en l'assicuranza da malsauns en il center, e quai tant en general sco er areguard l'admissiun da las furnituras e dals furniturs da prestaziuns. La libertad da contract stuess en mintga cas vegnir reglada sin il stgalim d'ina lescha.

Libertad
da contract

En la discussiun parlamentara n'è il nivel actual da las prestaziuns da l'assicuranza da malsauns da princip betg vegnì mess en dumonda. La pretensiun da qualitat premetta che las prestaziuns sa drizzian strictamain tenor ils criteris da l'efficacitad, da l'adequatezza e da l'economitad.

Dimensiun
da las prestaziuns

Ina minoritad dal parlament è da l'avis ch'i na saja betg raschunaivel e cunvegnent da fixar detagliadamain en la constituziun ils princips da l'assicuranza da malsauns. Oramai che quai è tuttina capità, avess quai almain stuì vegnir fatg senza prescha ed integrond tut quellas instanzas ed organisaziuns che giogan ina rolla centrala en l'assicuranza da malsauns ed en il sectur da la sanadad. Cun ils chantuns e cun ils auters circuls interessads avess stuì vegnir manada ordavant ina discussiun pli intensiva davart la tscherna dals cuntegns e dals princips da l'assicuranza da malsauns. Sch'i vegn accentuada mo la concurrenza, survegn il project ina paisa unilateralala. Fermemain contestada è la regulaziun, tenor la quala las contribuziuns dal maun public vegnan pajadas a quella instanza che indemnisescha las prestaziuns.

Critica dal project

En la discussiun parlamentara davart l'iniziativa dal pievel è il cussegl federal s'exprimì cunter in contraproject sin il stgalim da la constituziun, perquai ch'el era da l'avis ch'in tal na saja betg necessari. El temeva che l'elavuraziun d'in contraproject vegniss a retardar anc pli fitg las revisiuns currentas da las leschas. Il cussegl federal ha plinavant deplorà che l'artitgel constituzional è vegnì deliberà en prescha, senza ch'i saja vegnida applitgada la procedura da consens usitada. Il cussegl federal è ussa dentant da l'avis che l'artitgel constituzional ch'è vegnì elavurà dal parlament, gajja generalmain en la dretga direcziun. El po pia ir d'accord cun il parlament e recumonda d'acceptar quest nov artitgel constituzional.

Posiziun dal cussegl federal

Per tut quests motivs recumondon il cussegl federal ed il parlament d'acceptar il project «Qualitat ed economitad en l'assicuranza da malsauns».

PP
Spedizion postala

Trametter enavos a la controlla
d'abitants da la vischnanca

**Recumandaziun
a las votantas ed als votants**

Il cussegl federal ed il parlament recomondan a las votantas ed als votants da votar il 1. da zercladur 2008 sco suonda:

- Na a l'iniziativa dal pievel «per natiralisaziuns democraticas»
- Na a l'iniziativa dal pievel «Suveranitad dal pievel senza propaganda da las autoritads»
- Gea a l'artitgel constituziunal «Qualitat ed economitad en l'assicuranza da malsaus» (cuntraproject tar l'iniziativa dal pievel «per premias da la cassa da malsaus pli bassas en l'assicuranza fundamentala» ch'è vegnida retratga)

Fin da redacziun:
20 da favrer 2008
Edì da la
chanzlia federala

Ulteriuras infurmaziuns sut:
www.admin.ch
www.parlament.ch
www.ch.ch